

## 5. Topa' Nitak An

### Laisiangtho bulphuhte

Matt. 26:17-30

1Cor. 11:17-34

Luk. 22:7-20

1Cor. 10:14-17

Ephe. 3:17

Mark 14:12-20

Jn. 6:27-58

### b) Topa' Nitak An cih bang ahi hiam?

Hih pen Topa Zeisu in a phuh leh thu a piak an nekna lim hi, tua sungah Christian-te in Ama kithoih, kipumpiakna phawk uh hi; tua sungah Ama sihna hamphatna sunga a man ngah khak tan phawk kik uh hi; tua banah tua nekkhopna ah Pasion tungah lungdam kohna tawh Amah leh Christian dangte tawh kikholhkhopna sung a i kizop tuahna ahi hi. Topa nitak an in eite lungsim ngaihsutna Zeisu kiangah hong tungsak-a eite ading bang hong sepsak khin cih singlamteh tungah leitung ading a sepnate hong phawk kiksak hi.

"A hangin, hih an lum ne a, hih hai na dawn simun Topa sihna ama hong pai dong a tangko na hi uh hi" (1Cor. 11:26).

"Topa' nitak an pen a Siangtho Nekkhwam, Eucharist, Khomun balnena, leh Topa' sabuai zong kici hi.

### c) Hih in bang khek

Kum sim in Jew mite in paisanpawi bawl den uh a, tua pen Egypt pan Israel mite Pasion in a paikhiatpilh ni salltanna pan a hotkhiatna phawkna hi (Exo. 12:1-5). Tua zan in Israel mite inn khempuiah ah tuuno khat ciat kigo a, sihna vangtung mi khut sung pan tua innkuan a hotkhiat nadingun kong khak khuamte tungah a sisan kitheh hi. Tua khitteh tua tuuno kihang (roasted) in kine hi. Hih tangthu sunga thupiang pen Calvary singlamteh ah Zeisu Khazih in mawhna saltanna pan Pasion mite a hotkhiatna ding lahna lim ahi hi. Tua Paisan Pawi a kibawl laitakin Zeisu in Topa' nitak an tawh na khek hi (Luke 22:7-20).

### d) Koici bawl ding i hiam?

Zeisu in amah kiman in a kikhai lupna in a nungzuite tawh hih annekna na bawl uh hi. Tua nekna sungah Zeisu in koici banga i bawl ding hong deihna zuih ding thupi tuamtuam na pulak hi.

1. Ni khat peuhpeuh pen Topa nitakan nek nading in kituak hi. Zeisu hih pen Sabbath aih keileh Sundayte teello in hong pulak hi. Thu-um masate in hih nekkhopna pen nisim-a a bawl na uh kilang hi (Act. 2:46). Tua khit ciangin nipi kal khat in khat veita na bawl uh hi (Act. 20:1).
2. Mun khat peuhpeuh: pen hih nekkhopna bawl na dingin kitel thei hi. Biakpiakna mun leh biakinn ahing ding kisan lo hi. Zeisu in aituam inn khat teel hi.
3. Hun khat peuhpeuh ah: Topa nitak an pen ngeina bang ahi lo, kikaihkhopna leh kikhopna khatpeuh ah kizang thei a, tua nekkhopna a kibawl na a hang a man kei nakleh hih theih hi. Zeisu in thu kikap khop ngeina hun sung khat ah hih nekkhopna bawl ding na teel hi.

### e) Topa nitak an a khiatna

Hih nitak an sunga khen nihte pen Khazih pumpi etsakna khomun leh, sisan etsakna

hai ahi hi. Zeisu pumpi pen sihna sungah kipia-a, tua pen nuntakna i ngah theihna ding ahi hi. Zeisu sisan pen eite hotkhatna dingin kibua a, tua Zeisu sisan tungtawn mawhmaisakna leh mawhna leh a nungzui thupiangte khempeuh pan sawpsiangna i ngah hi.

#### f) Bang hangin hih Nekna Bawl i hiam

##### 1. Phawk ding

Zeisu in “Kei nong phawkna dingun na hih un,” ci hi (Luk. 22:19). Singlamteh tungah thupiang pen lungsim sungah a thaksuah den leh i lungdam theih ding hong deih hi. Tua hai pen a taktak in, “Lungdam kohna hai” ki ci hi (1Cor. 10:16). Singlamteh tunga Zeisu sihna ngeina leh a thupina i phawk ding kisam hi. Hih pen tangthu khempeuh ah a thupi bel thupiang ahi hi. Banghang hiam cihleh hih tungtawn in Amah tawh kizopkik theihna dingin mite pumpi, khomun tawh a kilak pen i nek ciangin upua tawh i lungtawng sungah Amah i san kei a, hih Ama kammal khempeuh tawh nungta in i kivak kei peuhpeuh leh Ama nuntakna thei lo ding i hihna i phawk thei hi (Jn. 6:35-58).

##### 2. Pulak ding

Zeisu tunga ki-ap mite bek in hih nekkhop a tan theih nading thu a ngah mah bangin, tua bang a bawl na tawh Khazih pen i Honpa leh Topa a pulakna hong suak hi. Hih tawh Amah hong paikik dongin Topa’ sihna i tangko hi (1Cor. 11:26).

##### 3. Kihel ding

Hih nekkhopna i neih leh khomun leh hai a en bek hilo in, ne in dawn takpi hang-a, Khazih pumpi leh sisan ah kihel hihang (1Cor. 10:16). Tua hi a, Zeisu Khazih tawh kikhawlkhawm aihkeh zangkhawm hihang. Ama sunga i kisap thaksuhsakna i ngah theihna dingin upna tawh a tawntung in Khazih tawh i kivak ding kisam hihang (Eph. 3:17).

##### 4. Thukhun ding

Thu khunna pen mipawl nih kikal ah na khatpeuh sep ding a thukimna aih keh kiciamna hi. Hih pen kamciam bang dan hi. Hih nekkhop ha i bawl na sungah Khazih tawh thukhun kizop tuahna bek hi lo in khat leh khat kikal zong ahi hi. Zeisu in, “Hih hai, note adinga kibuakhia ka sisan a thukhunna thak ahi hi.” ci hi (Luk. 22:20). Topa nitak an nang le nanga ne na hi kei a, tua thukhun thak maan ah a kihel mi dangte tawh na ne khawm hi. Khomun in eite a dinga kikhailum Zeisu ci le sa pumpi bek a gen hilo in, Ama nungzuite i hih mah bangin i vek a i kihelna Ama kha pumpi leh Amah lutang a hihna tua pawlpi a gennuam ahi hi (1Cor. 10:17).

##### 5. Thupha Piak ding

Hih nekkhopna pen eite tawh a kilawm kituak hilo a, Pasion hehpihna nekkhopna hi eite in Pasion thu i man na tawh i bawl teh Pasion in thupha hong pia ding hi khomun leh haite pen mitphial vai hilo a, amau le amau in bangmah sep zawhna nei lo uh hi. Upna bek tawh Khazih nuntakna hong kithunlut ahi hi. Cidamna zong Zeisu thuakna leh sihna hangin hong tung hi (Isai. 53:4). Hih Topa nitak an zangin singlamteh tunga Zeisu in singlamteh tunga Zeisu nasep i phawkna tawh tua damna pen ei le ei in ngah thei in, upna tawh ahi hi. A taktak in singlamtah tunga Zeisu nasep hangin thupha khatpeuhpeuh ei le ei in a kingah thei ahi hi.

**g) Kidawm in**

Corinth pawlpi mite in Topa nitak an a zatdan uh hangin Paul in na tai hi (1Cor. 11:17-18). Pawl khatte zu kham a a om laitak un pawlkhatte gilkiel in om uh hi. Hih bang tawh pawlpi daisak in thu-um mi dangte maizumsak uh hi. Nekkhopna a nei uh bel hih tuak a, ahizong in Topa Zeisu kipumpiak kithoihna leh Khazih pumpi sunga sanggam pasal leh numeite phawklo in amau leh amau thu in bawl uh ahihman in amau leh amau tungah Pasion thukhenna tungsak uh hi. Tua hangmah tawh mi tampi cina in pawlkhatte in sihlawh uh hi. A kilawm lo a Topa nitak an nekna dawnna neih loh nading in ei le ei kisittel in eite leh Pasion kikal, eite leh mi dangte kikal a maanlo na khatpeuh i maansak ding ahi hi (Psa. 139:23-24).

Pawl pi tuamtuan in Topa nitak an zatdan tuamtuan a neih tek lam uh phawk ding ahi hi. Makaihna in hong phal keileh tuate zatdante langkhat ah i pan ding pen khialhna hi ding hi.

**h) A Tom in**

Topa nitak an ah Cavary enkiel in phawk in. Pasion thupha pia dingin ento inla genzawh lo a letsong hangin lungdamko in. Na kim le pam en in na thu uppih dangte hangin Pasion tungah lungdamko in. Amaute tawh a maan kizopna na neih lam kiciansak in. Na mawhna ki-en in Pasion tungah pulak in. Banghang hiam cihleh hong siangsak dingin Aman hong kamciam hi. Topa hong paikik ding enkiel inla, Ama deihbang sem dingin nang le nang kipia in.

**i) Dotnate leh kikap khopnate**

1. Zeisu in "Mihing Tapa a sa ne a, a si na dawn kei uhleh note sungah nuntakna na nei kei dinguh hi." (Jn. 6:53) a cih teh bang gen nuam hiam? Hih thu a genna munteng John 6:27-58 na ngaihsut khite teh hih dotna dawngkik in.
2. Topa Nitak an na nek nading pan bang nate in hong cing lo sak hiam?
3. A kilawm lopi a Topa Nitak-an nekna tawh cinatna leh sihna nangawn mite in thuak thei takpi mah hiam? (1Cor. 11:27-32).
4. Topa nitak an sungah khomun leh lengahzute i nekma in thupha a pia dingin siampi khat i kisam hiam? Na Pawlpi ngeina zuihdan ah hi bangdan na neih leh Topa Nitak-an bawl na tawh kisai thuhilhna na makaipa' kiangah na neih ding kisam hiteh.
5. Topa nitak-an ka zat teh damna leh saltanna pan suahtaknate bang hangin ngah thei na hiam?
6. Bang hangin tangthu khempeuh sungah singlamteh tungah Zeisu hong sihna a thupi bel suak hiam?
7. (Na pawlpi makaihna in hong phal leh) Lungdamna leh na kisittel masak ding mangngilh lo in na lawmte tawh Topa nitak an zang un. Damna leh koltan na pan suahtakna cihte na kisap leh singlamteh tunga Zeisu nasep phawk in khomun leh lengahzu na zat leh upna tawh tua na kisapte Pasion kiangpan ngah in.

**i) Tomlakna leh zat pahna**

1. Topa nitak-an zatna pen eite ading a kibalnen Khazih pumpi etsakna khomun nekna leh eite a ding a luang Khazih sisan etsakna lengahzu dawnna hi.
2. Topa nitakan sungah Pasion leh a pawlpi kikal a thukimna phawksak den na khat om hi. "Na phawkna dingin cih kammal pen Greek kammal 'anamnesis' hi a, hih

pen mihing in Topa a phawkna ding ciangbek hilo in, Pasion in Ama Topa kithoih biakpiakna leh tua tungtawn a mihingte tawh a bawl thukimna Pasion in a phawkna zong kawh hi. Topa nitak an nekna ah i kihel sim in, eite tunga hong kamciamte Pasion in phawk hi.

3. Topa nitakan in Zeisu i lunglut na hong tun-a, tua ahihman in ni khatpeuh, mun khatpeuh leh hunkhatpeuh a i bawl ding hoih hi.
4. Topa nitak an i zat ciangin Pasion in eite tawh hong thukimna a bawl bek hilo in, Pasion sungah khat le khat i kizop tuahna zong a bawl hihang.
5. Pasion mai-ah i siantho ciang bek in Topa nitak an zatna sungah i kihel ding kilawm a, khomun leh lenggahzu i nek ciangin upna tawh i zat ding ahi hi.